

浮

溪

集

開化圖書館

Kaizhuo library

四

開化圖書館

Kaishua library

開化圖書館

Kaishwa library

開化圖書館

Kaishua library

浮溪集卷十四

宋

汪

藻

撰

丙制

觀文殿大學士宣奉大夫朱勝非奏受告新差江

州路安撫大使知江州乞就近別行差官不允詔

朕歲有邊虞日修戎備念振先聲于殊俗莫如舊弼之

英材爰方鎮于三分庶折衝于萬里矧伊溢浦實控上

游豈無他人徒得卿重謂抗旌而就道卽交印以臨軍

乃騰遜避之章殊失倚毗之意惟賢者同民之憂樂惟

館
ry

大臣繫國之安危況自鄂以趨江可朝發而夕至無失
機會勤吾顧憂所請宜不允仍依已降指揮疾速前去
之任故茲詔示想宜知悉冬寒卿比平安好遣書指不
多及

新除參知政事李回辭免恩命不允詔

朕惟天下之事一日二日萬幾不植則僵不修則壞況
今中外岌岌干戈未寧疆宇未復可終食之間輟而不
圖哉卿早躋禁塗蔚爲舊德世故精練審而有謀本兵
幾年綱目咸理是用輟從右府擢貳中台庶藉老成之

開

人同紆今日之急乃抗章來上豈朕所望哉卿其趨攬
事樞思所以康濟艱難者分陰可惜勿復重陳所請宜
不允

新除同知樞密院事李回辭免恩命不允詔

朕惟國家傾危屯否未有甚于此時者也非得天下人
豪策慮出乎拘攣之外者不足以輔成中興之功以卿
有當世之材遠古人之學詳練周密爲時耆明故聞千
里之造朝寢食不忘于虛佇擢賓樞機之地共圖龜鼎
之安卿而不能尚誰可者勉服朕命毋庸固辭所請宜

不允

新除起復鎮潼軍節度使開府儀同三司充醴泉
觀使孟忠厚辭免恩命乞許終喪制不允詔

朕以卿材猷通敏識度邃深無忌于憂患必同未嘗有
已野王以器能自進不專爲恩比緣長樂之哀追念渭
陽之後頒朕徽數奪卿至情顧勲賢之竝隆于恩禮以
非過抗章而避何志之謙所請宜不允

寧武軍節度使開府儀同三司新除淮南路宣撫
使劉光世辭免恩命不允詔

朕惟淮右失平居民無益旣塵氛之稍輯當耕戰之兼
修卿爲國折衝實民司命社稷已資于忠力山川咸震
于威名仍重使權俾營軍實及國家之間暇收農畝之
荒餘率衆踰江分屯力穡昔充國留田于漢鄙坐制先
零重華給耒于唐軍卒全振武可令長算有愧前人其
趨奉于詔除毋或差于機會所請宜不允故茲詔示想
宜知悉春暄卿比平安好遣書指不多及

新除資政殿大學士提舉萬壽觀兼侍讀王綯辭

免恩命不允詔

詩曰雖無老成人尙有典刑書曰人惟求舊器非求舊
惟新蓋老成舊人之于國家其重如此朕以卿有精深
之學通濟之才出入周旋在廷最久茲因誠懇亟解繁
機故加卿以秘殿之資處卿以中都之館留陪經幄不
使去朝茲大臣出處之殊榮而朕待卿之至意也採之
輿論咸謂得宜援例力辭卿言徒費所請宜不允

王綯爲從弟投拜金人自劾不允詔

昔羊舌坐誅靡連叔向王敦稔惡猶赦茂弘蓋古者君
臣相與于腹心之間未嘗以兄弟輒投于形跡之地卿

開

秉德陪朕二年于茲險阻艱難備宣忠力豈容纖介及
我老成況綱之于卿本非同產雖虧臣節了不相關卿
何嫌何疑而求去位乎卿其勉服厥官思所以弼朕者
抗章自劾非所望于斷金也

新除起復依前檢校少保光山軍節度使知大宗
正事士儻辭免恩命不允詔

朕惟卿資宗室之英擁將旄之重俾統盟于庶族用藩
屏于行朝庶藉本支之彊永圖龜鼎之固雖中外屬阼
危之會而戚休惟同姓之均盍體詔恩卽祇官守懇辭

之語朕未欲聞

新授觀文殿學士提舉臨安府洞霄宮范宗尹辭
免恩命不允詔

朕委政于卿逮茲朞歲吁俞帷幄弘益居多比緣人言
釋位而去懇牘屢上挽留莫從書殿隆名蓋裒舊弼國
家常典何足固辭所請宜不允

新除資政殿學士提舉臨安府洞霄宮任便居住
張守辭免恩命不允詔

卿奮于周行以誠輔朕飭躬寡過持論正平始終二年

朕所眷禮方賴弘益浩然求歸挽留莫從良鬱予抱升
華秘殿姑示異恩式寵爾行毋煩遜避所請宜不允

溫州觀察使王瓊辭免復兩官恩命不允詔

卿頃將去病之軍嘗坐孟明之胄稍鑄勇爵久掛刑書
既屢奮于徂征當悉除于宿負還卿舊著示朕至恩庶
寬左袵之憂用拯東隅之失往祇承命勿復固辭所請
宜不允故茲詔示想宜知悉冬寒卿比平安好遣書指
不多及

資政殿學士權知三省樞密院事李昉乞閒慢差

遣不允詔

朕方排難而解紛未暇宅中而圖治乃眷重江之阻實
宜慈壺之居爰輟輔臣往司行省以卿負古人之學有
當世之才比擢預于政機坐收還于威柄詳觀底蘊尤
具典刑茲權中外之宜實付安危之計是爲分陝咸謂
得人奚未喻于至懷尙力辭于成命往圖經濟用釋顧
憂

新除江南東路安撫大使兼知壽春府滁濠廬和
州無爲軍宣撫使葉夢得辭免恩命不允詔

開

朕惟多事以來厥民塗炭大軍之後所至荆榛日求綏
馭之良庶復纂承之舊惟大江襟帶之會實前古國都
之餘地關安危勢控南北豈獨賴兵民之鎮蓋將期農
戰之修非吾耆舊之英孰任倚毗之大爰頒優詔用畀
劇權謂與人而同憂必不日而引道乃形遜牘殊拂眷
懷其趨屈于提封以毋勤于軫慮所請宜不允仍不得
再有陳請諸處不許收接文字日下前去之任故茲詔
示想宜知悉秋冷卿比平安好遣書指不多及

參知政事謝克家乞外任宮觀不允詔

朕惟卿直諒多聞于國家有益方艱難之際將每事咨焉而屢以微疴慨然求去非朕意也方春和豫輔養其時勉爲朕留勿思閒適所請宜不允

新除資政殿學士提舉臨安府洞霄宮謝克家辭免恩命不允詔

卿以剛明之材行精詣之學以卓至之論啓淵深之謀矧嘗率先羣臣見朕初載有房琯之辯宋昌之忠茲升廟堂相與圖治曾未數月決然請辭朕雖貪夫老成之留而閔以官職爲累升華秘殿庸示至恩胡爲抗章貶

開

損殊甚卿而不可尚誰可哉式煥爾行毋虛朕意所請
宜不允

兵部尚書謝克家辭免恩命不允詔

朕遭時多故燭理未明肆求已試之材共振中興之業
以卿清名垂世雅望在人茲祇召以趨朝見敏誠于體
國擢居常伯姑示優恩奚固執于沖懷未卽膺于成命
所請宜不允

新除端明殿學士簽書樞密院事富直柔辭免恩
命不允詔

朕惟慶歷宗臣馳單車入不測之敵以片言成萬世之
功相吾三宗如古伊呂朕慨然懷其人而不及見也以
卿高明渾厚德頗似之故擢之衆人之中付以臺諫之
職果能從容議論動中事幾乃躋宥密之庭將賴維持
之力庶使紀綱一振威令四馳坐臻宗社之安復見君
臣之盛豈不濟卿奕世之美而成朕知人之明乎陳義
固辭良非所望所請宜不允

杜充同知樞密院事辭免恩命不允詔

朕惟今日之事在于審觀機會先立規模度吾足以勝

開

彼與吾足以守此者而已以卿資兼智勇識洞古今茲
予付爾以本兵之任此孟子所謂國人皆曰賢然後命
者也豈朕私意哉奚乃累章過形控避朕言不再勿復
重陳

復觀文殿學士知潭州吳敏乞辭免恩命不允詔
朕惟湖湘之會紛擾數年耕稼之區榛荒千里思得魁
柄之舊倚如長城之堅以卿宇量恢宏材猷英發蚤參
帷幄之論具有指紳之瞻乃遣使輶特頒詔檢庶此遐
方之弊隱然賢弼之臨引手以摩知生之樂胡遽形于

遜避殊未體于眷懷念方急于淮揚徒得君重當俯同
于去病無以家爲勉疾而驅欽承朕命所請宜不允限
指揮到日疾速前去之任故茲詔示想宜知悉秋涼卿
比平安好遣書指不多及

仲琮乞罷宗正司不允詔

卿以老成爲宗室祭酒阡危之際所賴維城有何嫌疑
而遽求去露章來上良用憮然所乞宜不允

辛企宗乞免秦鳳路經略安撫使不允詔

朕念秦中之疆弱常爲天下之重輕故擇能臣往圖長

開

算以卿挺雄剛之質秉忠義之心世服戎昭習知邊瑣
威名之烈關隴信之茲歷選于在廷俾綏懷于一道義
無反汗當卽辦嚴抗牘以辭豈予所望

新除吏部侍郎高衛辭免恩命不允詔

朕以卿爲時名卿如古耆俊當震風凌雨之暴未嘗或
辭于錯節盤根之間靡所不試比還表著良副眷懷處
以天官之除將資辰告之益茲卿舊物奚用固辭

新除吏部侍郎黎確辭免恩命不允詔

朕惟天官之任人物所宗以撥煩剗劇之材而行激濁

揚清之政號稱茲職古難其人以卿學術精深行能高妙周旋諫省綿歷歲時知無不言言皆有補乃付銓衡之寄實爲表著之光公論翕然謙辭過矣

新除禮部侍郎李正民辭免恩命改授一閒慢職局不允詔

朕惟典禮之在有司非人莫濟秩宗之于省戶其選甚高卿辯博多聞剛明不撓踐揚滋久譽望益隆眷惟千古之彌文宜付一時之俊彥故從劇部移寘清曹朕擇地以處卿可謂優矣卿抗章而辭朕何其過哉

開

新除戶部侍郎季陵辭免恩命不允詔

朕惟周官以司徒致天下之財而冢宰均節之其權可謂重矣後世惟鹽鐵領于丞相而出納之要實總地官自軍興以來調度百出則戶部蓋兼蕭何劉晏之任迺者官缺頗難其人以卿詳練精明神無滯用通于世務所至可稱悉付利權僉言惟允亟供爾職何以辭爲

新除吏部侍郎李正民辭免恩命不允詔

朕惟孔子之門雖文學政事別爲二科然西漢名臣列于九卿者未嘗不以儒術飾吏事也卿文章爾雅直諒

多聞獻納之餘敏于從政乃擢天官之貳俾專銓綜之
權命出惟行毋煩遜避所請宜不允

起復中散大夫試尚書戶部侍郎兼權御營使司
參贊軍事李迨乞持餘服不允詔

朕屬艱難之運須濟辦之才不究利源孰資軍實以卿
通明無壅更練已多茲升禁近之聯俾貳劇煩之部當
趨邦國之急暫輟家庭之憂勉服攸司毋庸有請

新除吏部侍郎綦密禮辭免恩命不允詔

朕惟天官之職人物綜焉南渡以來法隳吏弛思得能

開

者以振頽綱卿識照幾先才周世用見聞殫洽知祖宗
沿革之宜學問精深得師友淵源之正比借才于銓筦
果騰譽于簪紳灼見所長就加茲命舉直錯枉佇成平
允之功辭尊居卑宜略謙冲之禮

新除徽猷閣直學士知漳州綦密禮辭免恩命不
允詔

朕惟卿有裴馬之才高崔之學徧儀禁路蔚有能聲茲
求便私殊惜而去西清之秩惟以寵行往重郡符何辭
之有

浮溪集卷十四

開化圖書館
Kachua Library

浮溪集卷十五

宋

汪

藻

撰

內制

梁丞相辭免恩命不允批答

昔在舜禹舉賢自輔非臯孰賡非益孰贊然未嘗與民
道其所以當爲相之意而民自孚焉蓋至于商周然後
彌曰帝賚佐曰天生以神其事而播之于衆雖濟川補
袞功光前人而四代之風于斯別矣卿學優聖域才冠
倫魁質諸卜筮而不疑編諸方冊而無愧問朝問野人

皆曰賢今茲召卿來歸朕見之曰此予輔民間之曰此
吾相尚何待疏霖雨之命賦清風之章而後能鼓動于
中外也哉而卿尚秉謙光未服厥位則是上未能體朕
之意下未能副民之情恐非朕與斯民所以望于卿也
夫僂偃而共命者辭遜之末節宥密而基命者弼亮之
遠圖渙號已孚控辭勿再

王丞相辭免恩命不允批答

朕觀于易至恒之象

案原本因避宋真宗諱凡恒字皆作常今遇引用經史語悉更正

曰君子以立不易方夫恒之六爻惟九二悔亡者以其

能久中也蓋九陽德二臣位秉堅純之德處通顯之位
而能久中道則何有悔哉在真宗時則有若王曾確守
勁節徧更重任而至誠無息故能輔政之久到今稱焉
此殆有得于恒九二之義也卿以諒友端朝之望雋明
康世之才自代綸言預機政以至爲相于茲十載而事
朕蓋猶一日朕方照臨百辟灼見乃心茲用冠于宰廷
益資遠業而卿迺未卽祇命尚爾控辭夫遜于稷契臯
陶蓋重亮于舜采然有若散閔宮括亦均迪于文彝其
懋經綸勿復有請

辛企宗辭免御營使司都統制不允批答

朕以卿忠義沈雄得其家法爲予敵愾所向有功茲升
統督之權將責扞防之事懇辭之語豈朕欲聞

賜士儂辭免宗司不允批答

朕嘉周詩常棣之華念漢室葭莩之弱欲司屬籍當得
宗英旣加委任之專應有褒崇之渥乃錫綠綈之詔俾
承夏篆之車理亦宜之人誰議者固守謙冲之志豈昭
孰睦之誠

賜士儂辭免檢校少保不允批答

開

朕以卿宗室儀型之老閱天下義理之多乃升執帛之
聯式重維城之寄胡爲難進每欲固辭當勉拜于思書
毋再形于遜牘

文武百僚宰臣范宗尹等上表乞遵隆祐皇太后
遺誥服朞允批答

朕惟隆祐皇太后體柔明之德履屯否之期擁佑朕躬
厥恩甚大昊天不弔奄棄宮闈追攀無從欲厚之報雖
喪與其易也寧戚固合從隆然禮稱情謂之節文又當
知變封章來上有槩予心勉奉遺音茹哀何極所請宜

允

文武百僚范宗尹等上表請皇帝聽政不允批答
朕聞哀所貴者稱情喪不容于二事此先王制禮以厚
人倫而自天子達者也迺者東朝棄養朕念夫保佑之
恩欲極其報禮顧有制而不得爲者方用怵惕靡寧于
心豈有儼然在喪服之中而可以輒治他務者乎當宁
而躬萬幾之煩非惟不安蓋亦未暇所請宜不允

文武百僚宰臣范宗尹等再上表請皇帝聽政允
批答

開

朕自罹東朝之憂不能食事者數日庶以有餘之哀補其不足之禮而卿等屢以四方未靖萬幾不可久曠爲言朕亦安敢背先王制禮之意而失俯就跂及之中乎所請宜允

范宗尹辭免右僕射不允批荅

朕履國家之否運思得天下之奇材以卿粵從布衣早有人望屢擊權臣于方用未嘗奸利以微名每陳治道之可行無不會文而切理洎擢參于大政尤灼見于所存一意盡公羣倫皆理乃付巨川之濟用符巖石之瞻

制誥一頒搢紳相慶佇卿行志知國有人謂當承命以周旋猶復抗章而遜避惟此舉而國無陋矣今何時而卿辭位乎勉究良圖毋庸再請

新除通議大夫守尚書右僕射范宗尹再上表辭免恩命不允斷來章批答

朕惟治亂兩途未有不由于用相君臣一德相逢鮮值于同時卿識遠而才全謀深而器遠學古人之至要言天下之大公簡于朕心非止今日故擢司風憲升預政機將觀所長不次而用而卿性資天至議論日新言其

開

重厚則如倚太山而坐中原語其疏通則若駕輕車而
就熟路乃布大號任之不疑卿當圖羣策以兼收念寸
陰之可惜立規模于素定應機會于方來輔成再造之
基同享無疆之福此則盡卿致主之術而成朕知人之
明也亟上封章百辭奚益

新除少保尚書左僕射呂頤浩上表辭免恩命不
允批答

朕惟漢唐中興莫盛于宣帝明皇之時而魏相姚崇爲
之佐是二人者皆以廟堂不世之才應天下無窮之變

用能易亂爲治卽危爲安勲業巍然照映今古朕甚慕
之迺者國家蓋多故矣朕念齷齪拘攣者不足以圖今
日之事思得英偉大度之士幹旋于談笑之間庶幾折
衝解紛無愧前哲卿宏博彊敏出于天資粵從外遷甫
期歲耳而人無小大皆有裏言乃登元宰之司仍進貳
公之秩茲實慰中外之望而非朕私卿也古所謂大臣
者以道事君不可則止今豈不可爲而當止之時耶其
勉修良規濟朕鴻業控避之禮毋庸再三

王綯第一表辭免參知政事不允批答

朕遭時多艱涉道尚淺緬懷鴻業未知圖濟之方思得
真賢庶任仰成之責以卿學兼今古節貫險夷徧歷禁
塗通知世務惟此延登之亟出于試可之詳僉曰汝諧
何辭之有

王綯第二表不允批答

朕惟有邦圖治之難嘉前古得人之盛乘變故搶攘之
後求剛明篤實之材以卿夙擅儒宗蔚爲國器徧儀臺
省積有歲時亟升廊廟之班實賴股肱之力茲爲僉允
非朕爾私謂當勉彊以赴功奚乃頻煩而稽命

杜充第二表辭免同知樞密院不允批答

朕遭世多艱臨川望濟求賢靡獲當饋興嗟以卿負天下之奇才明古人之大略兩京之績四海所聞茲擢預于幾微庶稍寬于憂顧朕志定于召卿之始卿謀期于彌朕之成衆論皆然屢辭奚益

新除參知政事李回上表辭免恩命不允斷來章

批答

朕錄德而定位量能而授官自一命以上必審稽功實未嘗以名器假人也況從容帷幄與朕日圖天下之事

開

者乎卿學通淵源世習臺閣預政未幾赫然有聞擢諸
樞機之廷付以丞弼之任惟九德咸事旣灼知之已詳
雖三命滋恭豈牢辭之可免趨體朕意毋虛厥官

新除端明殿學士簽書樞密院事富直柔上表辭
免恩命不允斷來章批荅

孔子曰視其所以觀其所由察其所安朕照臨百官蓋
率此道以卿天資警敏洞達古今負剛明之才操卓至
之論從容獻替有益于時自升臺諫之聯旣閱歲時之
久朕于卿志可謂灼知卿爲朕庸固已素定豈于今日

乃復可辭往卽厥官無煩辭費

文武百僚宰臣范宗尹等上表請皇帝御殿不允

批答

傳曰喪事欲其縱縱爾故騷騷爾則野所以辟不懷也
朕旣不能遂服以畢期年之哀顧纔閱旬日卽負展以
見羣臣而忘親恩之報天下其謂朕何便座疇咨治固
無壅必御正宁誠非所安

新除同知樞密院事富直柔上表辭免恩命不允

斷來章批答

朕惟人君知其臣之可庸故委以心而不貳人臣知其君之可輔故極其用而不辭此先主任武侯而張良從高祖皆終其身而不去者也卿自居臺諫之聯朕已有用卿之意況今預政滋久結知益深乃于序遷之命而諄諄以辭乎卿其畢精籌維圖所以報國者廉退小禮夫奚足爲

新除資政殿大學士提舉萬壽觀兼侍讀王綯上表辭免恩命不允斷來章批答

朕于羣臣無所不用其至亦無所不用其恩蓋有取于

孟子手足腹心之意況卿奉事惟幄歷年于茲直諒多聞仰成非一以禮進退雍容可觀疏恩雖隆是謂宜稱與其屢形遜牘伸冲素之懷孰若體朕誠心服休嘉之命

周望第一表辭免簽書樞密院事不允批答

朕惟天下之事常患于能者不使爲而爲者非其人故自艱難以來寤寐豪傑幾于一遇其真以卿有功名之心兼文武之器自予初載徧歷險夷師勝來歸國人屬目乃從輿望擢寘機庭謂卽慨然協圖康濟抗章牢避

開

豈朕意哉

周望第二表辭免不允批答

朕惟明君越資而用雋所以致天下之材志士愛日而就功所以趨國家之急以卿清剛有守明銳敢爲予于旬日之間任爾以本兵之重卿而不用尚欲何求胡抗奏以力辭旣喻懷而復請毋堅所執勉副朕知

滕康辭免權同知三省樞密院事不允仍斷來章

批答

朕惟古者扶危持顛之世必有任重致遠之臣天爲時

生國因人定此講成屯之策暫分臺省之權資碩輔之
經綸扈慈闈之跋履求之至矣今乃得卿謂聞命以辦
嚴反辭榮而繼請勉遵朕指勿復有言

劉珪辭免吏部尚書不允批答

朕以卿有老成之風精人物之鑒典司銓部縣歷歲時
檢柅吏姦衣冠所賴進居其長孰曰不宜方期勉卒于
前功胡乃力辭于新命往祗厥職副朕仰成

賈讜辭免寶文閣直學士不允批答

朕以卿性資明銳風力敏強厥望在人以憂去位惟朝

辭

廷之治方嘆于才難則門內之恩宜從于義奪趨膺成
命勿復牢辭

劉錫辭免熙河路安撫使不允批答

朕以卿屢稟廟謨習知邊鎮方時多故未寬西顧之憂
藉爾一行特付中權之任茲爲優眷倚俟壯猷何爲固
辭殊拂予聽

新除檢校少保定江昭慶軍節度使依前神武右
軍都統制張俊上表辭免恩命不允批答

卿以整暇提軍以忠勞衛國逢時艱棘屢立戰功旣外

禦于寇戎亦內銷于姦宄茲還表著彌尙撝謙乃申帶礪之盟益重腹心之寄義無反汗何以辭爲

檢校少保定江昭慶軍節度使張俊再上表辭免恩命不允斷來章批答

朕披荆棘以立朝廷聽鼓鼙而思將帥賞無妄予輕重眡功以卿闕闕屢聞搢紳有紀乃頒異數用示至公胡爲執謙久而未拜往祇朕命勿復重陳

新除起復檢校少師武成感德軍節度使韓世忠上表辭免恩命不允批答

開

朕惟寇入中原憑陵不忌而吾將士曳兵棄甲習以成
風斬將擐旗未之或見每懷及此朕甚恥之卿秉忠誼
之心厲梟雄之氣屯兵要害邀擊其歸大振軍威殺傷
過當殊方震疊知國有人師勝來歸摺紳屬日凱歌大
獻宗社安榮卿而不褒尙欲誰賞雖恥論功伐卿能師
馮異之謙而有功見知朕安可廢文王之信往祇新命
勿復固辭

新除起復檢校少師武成感德軍節度使韓世忠
上第二表辭免恩命不允斷來章批答

朕聞古人于將帥有功者聽鼓鼙而思指帶礪而誓或銘之鐘鼎或載之旅常非欲寵私其人所以令天下而使人知勸也卿爲王敵愾斬敵陷堅立志梟豪策勲奇偉乃頒異數以告諸朝卿而力辭義則高矣以此示後人將謂之何其聽朕言勉膺成命勿使國家有吝賞之名而蹈印劑不予之戒也

鎮潼軍節度使開府儀同三司孟忠厚上表辭免

恩命不允批答

朕惟袞鉞之班實兼文武之任累聖除授必求其人卿

既東朝之近親復有搢紳之秀譽爰攷輿論錫之贊書
胡爲謙沖屢以情論成命已出豈容復回

鎮潼軍節度使開府儀同三司孟忠厚再上表辭
免恩命不允仍斷來章批答

傳曰親不失其爲親故不失其爲故卿昭慈近屬才行
有聞艱難之時事朕初載可謂親且故矣視儀三司誰
曰不宜渙號已孚百辭奚益

文武百僚幸臣范宗尹等再上表請皇帝御正殿
不允批答

朕嗣守洪業五年于茲其在危疑之中所以扶持而全
安之者繫太母之力日冀光復駕旋舊京正東朝之儀
極天下之養而慈訓中奪煢然無依茲朕用摧割于中
而悼其志之弗遂也今甫終易月之制耳乃欲釋哀御
朝遽見百辟雖有彝章可攷豈朕所忍哉所請宜不允
文武百僚宰臣范宗尹等三上表請皇帝御正殿
允批答

朕惟先王之于喪紀因親疎隆殺之宜而制爲之極行
道之人皆弗忍也今慈訓日遠與其追不及之養而致

開

無窮之哀孰若安宗社奉遺言而存天子之孝哉羣公之請至于再三敢徇至情以隳彝制所請宜允

新除起復檢校少師武成感德軍節度使韓世忠

上第二表辭免恩命不允斷來章口宣

卿于國盡忠以功受賞屢形遜避殊拂眷懷命出惟行勿庸再請

韓世忠告敕口宣

卿振旅還朝執俘告社厥有疇庸之典是爲希世之恩往服寵褒益圖忠報

同知樞密院事李回批答口宣

卿五年去國千里造朝乃升樞筦之司將付腹心之寄
往祇新命勿復固辭

撫問韓世忠口宣

卿肅提精銳親冒險艱力輸敵愾之忠坐致執俘之衆
宜加恩撫用示眷懷

新除少保尚書左僕射呂頤浩上表辭免恩命不

允口宣

卿入造行朝廷登元宰豈特搢紳之願實爲宗社之休

往服攸司毋稽朕命

撫問呂頤浩等口宣

卿等分國顧憂暴師遐外方屬炎熇之候有勞綏馭之懷特遣信臣往宜至意

賜呂頤浩銀合茶藥并撫問一行將佐軍兵等口宣

卿等肅提有衆躬討不庭當冰霰之蕭辰涉江湖之遠道特馳轡御往示湛恩

范宗尹辭免右僕射恩命不允口宣

卿比符輿望進陟冢司方觀遠大之規模用濟艱危之機會已揚渙號難徇撝謙

新除通議大夫守尚書右僕射范宗尹再上表辭
免恩命不允斷來章口宣

卿比緣才望入秉事樞安危由此以坐分中外翕然而相慶趨圖成效勿復固辭

新除資政殿大學士提舉萬壽觀兼侍讀王絢上
表辭免恩命不允斷來章口宣

卿力辭機要願卽安閒乃疏尤異之恩用示老成之眷

開

亟膺茲渥無事于辭

新除參知政事李回上表辭免恩命不允斷來章

口宣

卿受天英氣爲國老成比膺籲俊之除屢貢辭尊之懇
往祇懋渥難徇冲懷

新除同知樞密院事富直柔上表辭免恩命不允
斷來章口宣

卿雖奉詔除未離機省乃布由衷之懇願還渙汗之恩
成命已頒忱辭祇費

滕康辭免權同知三省事不允口宣

卿總提臺省遠去朝廷顧委任之非輕豈異辭之可免
往思長算協濟危機

韓世忠辭免恩命不允口宣

朕以卿有功來歸邦國同慶賞雖甚渥人則宜之成命
已頒豈容反汗

新除起復檢校少師武成感德軍節度使韓世忠
上表辭免恩命不允口宣

卿執俘獻社祇召還朝乃頒國賞之醲用表戎昭之果

開

褒揚非過遜避奚爲

撫問劉光世等口宣

卿等總提貔虎控扼襟喉茲適屆于嚴凝當不無于暴
露勉殫忠力用副倚毗

檢校少保定江昭慶軍節度使張俊再上表辭免
恩命不允斷來章口宣

卿屢立戰功宜加勇爵爰頒渥惠用獎忠精亟體眷懷
毋煩遜避

撫問張俊口宣

提兵伐叛爲國除姦遄驅方警于前茅迅掃遂成于破
竹特馳信使往布殊恩

撫問王瓌一行將佐仍賜犒設口宣

卿等身更累戰力勦羣凶當鬱蒸炎燠之辰有暴露夷
傷之苦爰頒厚錫以示殊褒往究前功毋忘至意

撫問韓世忠等一行軍兵將佐口宣

卿等遠從江介祇護沁園惟道里之阻脩有風寒之匿
薄宜加慰撫用示眷懷

鎮潼軍節度使開府儀同三司孟忠厚上表辭免

開

恩命不允口宣

卿比用懿親特加徽數允協褒崇之典乃興謙挹之懷
往卽厥官毋稽朕命

孟忠厚辭免恩命不允斷來章口宣

卿奪服倚廬視儀揆路雖忱辭之屢罄固渙號之難回
其服殊榮以昭厚報

閣門賜孟忠厚告口宣

朕永懷慈壺追錄外家乃升肺腑之賢進視機衡之秩
往服贊書之寵永爲慶閤之光今賜卿告想宜知悉

賜呂頤浩茶藥口宣

卿遠拏舟楫來覲闕庭復瞻元老之儀刑嘉與羣工而
慰喜乃因迎勞申錫珍芳其疾而驅以承予睠

撫問呂頤浩王夔楊惟忠并賜銀合茶藥口宣

卿躬率軍鋒志清江介賊勢旣窮于不戰王靈遂暢于
無垠宜錫珍芳用昭眷獎

撫問呂頤浩朱勝非并賜銀合茶藥口宣

卿頃護諸將肆征不庭爰迅決于天誅遂肅清于江介
錫以珍芳之劑昭吾眷禮之誠今差某官傳宣撫問并

開

賜卿銀合茶藥想宜知悉

開化圖書館
Kathua Library

浮溪集卷十五

開化圖書館
Kaihua library

浮溪集卷十六

宋

汪

藻

撰

內制

左武大夫成州刺史京畿提刑兼權京城副留守

趙倫武德大夫忠州刺史京西南路提刑權知唐

州胡安中獎諭敕書

敕趙倫唐州境內措置保守一方軍民安堵及道路梗
阻之際差人遠赴行在奏報金人動息備見忠勤事爾
肅提有衆退保一方當橫流奔潰之時抱孤立激昂之

志扞防凶慝綏靖荒餘忘道路之險艱想朝廷于悠遠
乃錫命書之寵亟躋朝著之崇緬想忠誠惟深嘉歎故
茲獎諭想宜知悉春暄汝等各比好否遣書指不多及
武功大夫滎州團練使知郢州曹成武功大夫貴
州團練使知復州李宏并一行人兵獎諭敕書

敕曹成并一行人兵爾等昨遭戎馬之亂離親帥國人
之豪傑家雖罹禍義不受汙冒兵禨以直前慕王靈而
力戰旋投帥幕假守山城旣定荒餘之區恥從專輒之
命遠騰奏牘自拔歸朝載惟多故之時能盡事君之義

開

宜加顯秩并錫真符俾乃撫于州民得上通于王所往
提有衆各堅忠義之心毋使此方遂作華離之域款誠
備見嘉歎不忘故茲獎諭想宜知悉春暄汝等各比好
否遣書指不多及

李齊一行軍兵等獎諭敕書

敕李齊并一行軍兵等朕惟海岳之區久服侵陵之毒
王靈靡及戎德無厭爾等合閭里之諸豪冒干戈而力
戰其行莫遏所向有功遂摧席勝之凶頗獲提封之舊
爰加勇爵用表軍鋒俟登井賦之輿圖其上師徒之闕

閱緬聞忠烈良用歎嘉除李齊先次給告授武翼郎閣
門宣贊舍人外一行軍兵候收復到郡州具功績申尙
書省取旨褒擢故茲獎諭想宜知悉春暄汝等各比好
否遣書指不多及

知信州李尙行等獎諭敕書

敕李尙行等省所狀申據宜撫處置使司前軍統制軍
馬帳前使臣孫德狀專差前來信州等上饒縣取本司
參議王以寧所寄官告物帛等其本州未敢便行給付
更合取自朝廷指揮施行事昨遭時艱靡吝爵賞懼申

關槐

覆或差于機會故出征多付于便宜豫錫贊書俾專除
命逮循常之既久與擅爵以無殊每念其非未知所革
爾等居官詳練臨事敏明能上體于朝廷知不輕于名
器屬觀敷奏良用歎嘉今信州將上件告等盡數申納
尚書省故茲獎諭想宜知悉春暄汝等各比好否遣書
指不多及

拱衛大夫成州團練使權荆湖東路副總管馬友
并一行官兵等獎諭敕書

敕馬友并一行官兵等比者劇盜憑陵遐方震擾汝等

忠能徇國勇不顧身帥名義以直前拚凶徒而鏖擊國
威大振賊黨幾殲覽書備見于忠勤當宁不忘于嘉歎
除馬友特與補正拱衛大夫成州團練使差權荆湖東
路副總管候擒獲孔彥舟與正差其一行官兵仍令馬
友先次開具實立功人申本路安撫司保明聞奏當議
優異推恩故茲獎諭想宜知悉秋熱汝等各比好否遣
書指不多及

從義郎張琪等獎諭敕書

朕惟敵暴中原民亡本業慨然西顧寢饋不寧爾等奮

關

哀鄉社之豪圖復土疆之舊歸吾方伯願備行間忠義
可觀歎嘉何已

漢陽軍荆湖東路招撫使馬友獎諭敕書

敕馬友省所奏進奉天申節功德疏并銀五百兩事具
悉卿當艱難之時膺遐外之寄兵革充斥道塗阻脩乃
記誕彌之辰具輸方貢之物載于忠實獨冠等夷知憂
顧之可紓覽奏陳而興歎故茲獎諭想宜知悉秋熱汝
比好否遣書指不多及

武義大夫忠州刺史閤門宣贊舍人襄陽府鄧隨

鄂州鎮撫使桑仲獎諭敕書

敕桑仲朕惟邊圉不寧中原失馭凡王靈之靡及皆寇
虐以顯行汝盡節朝廷有功江漢見姦人之專殺用國
法以成禽坐使羣方肅然知畏剡章來上良用歎嘉故
茲獎諭想宜知悉秋冷汝比好否遣書指不多及

趙公謹獎諭敕書

敕趙公謹等省撫州狀契勘本州據管下金谿縣申爲
饒州信州界內有事魔賊徒王九十二殺人放火去本
縣界甚近州司差撥巡尉等前去把隘據知金谿縣統

開

領把隘所郭玠等申魔賊侵犯金谿縣卽時統率弓兵
鬪敵殺獲賊級等事迺者妖眚亂常干紀一方騷動民
不奠居爾等冒險直前以誠許國提軍力戰反賊伏辜
道路清平城郭安堵旣備知于忠誼顧何愛于寵褒詳
覽奏陳惟深嘉歎其弓兵等仍仰本州量功力等第特
行犒設一次故茲獎諭想宜知悉秋冷汝等各比好否
遣書指不多及

青州劉洪道獎諭救書

朕惟全齊沃衍之區遭強寇憑陵之毒連城莫守毀節

相望卿挺志孤堅奮身忠勇以闔境凋殘之後于橫流
奔沸之中哀集兵民指揮將帥揜羣兇而鏖擊揅一路
于阡危將乘其鋒悉復諸舊載披來奏深用嘆嘉

戒諭劉洪道敕書

爾履百戰之軍鋒保一方之生齒迄臻寧謐備見忠勤
然方面之權豈容或二軍中之令尤在至公必洽輿情
方收羣力儻習因循之弊坐乖綏馭之方無以禦戎便
成誤國其體倚毗之意無從牽制之私

戒諭李逵宮儀張成等敕書

關

敕李逵等朕惟疆寇憑陵山東震擾保此數州之地皆
而諸將之功雖在艱難頗寬憂顧今還洪道制置之節
付宮儀濟南之符并召閣臯來朝行在率掄材而顯用
非因事而有他爾等夙著忠誠各膺委任宜互傾于肺
腑以同獎于朝廷速底成功是爲報國

京畿京西湖北淮南路諸州軍撫諭敕書

敕開封府等官吏軍民朕惟中原耕稼之區遭疆寇侵
陵之毒百城相望無復炊煙三壤雖存鞠爲茂草每興
言而及此輒回首以愴然使民喪亂以無歸皆朕菲涼

之所致幸昊穹之悔禍偶邊鄙之息肩顧乖離蕩析之
餘宜還定拊循之急故令方伯就布詔恩爾其勉率族
姻歸安閭里庠錢鎛而觀銍艾雖未能卽及于周詩賣
刀劍而買犢牛庶或可漸成于漢俗亟臻寧謐用副焦
勞故茲撫諭想宜知悉夏熱汝等各比好否遣書指不
多及

麟府等州撫諭敕書

朕惟中原俶擾並塞繹騷古稱河外之區世作朝廷之
屏雖拜戎之不暇終固圉以無他繫兵民竭力于保邦

關

亦官吏有謀而綏衆尙殫忠盡無負顧憂

范溫等撫諭招收救書

敕范溫等省所奏今來京東路登萊等州似溫等諸頭
項忠義之人不少緣未知車駕駐蹕息耗未肯前來伏
望給降海行撫諭付溫等招收併力勦金人事具悉朕
昨遭左衽之侵頗失中原之馭凡承平之故俗皆隔絕
于殊邦按圖以思當饋而歎茲暫留于越嶠悵尤闊于
齊封乃聞英豪多率徒旅堅塢壁以自守冒干戈而直
前懷祖宗涵養之休恥讎敵服從之醜嘉汝能爾爲之

慨然爰頒惻怛之書用示綏懷之意其懋合并之力以圖興復之期趨掃邊塵永同文軌故茲示諭想宜知悉秋涼汝等各比好否遣書指不多及

南平王李乾德嗣子陽煥弔祭敕書

卿藐居要服夙慕華風方嗣守于世封願入輸于方貢載惟誠款良用歎嘉

賜大食國敕書

敕大食國王姓名汝分藩遐服率職中原比緣兵禠之交致阻詔函之達緬惟恭順兼受福祥茲臨風露之辰

關

益慎寢饗之節賜汝某物至可領也

河南府官吏軍民撫諭敕書

朕惟澗瀍之墟陵寢所鎮隔絕多事侵尋累年慨然永懷憂或忘食汝等固守巖邑盡誠本朝屢收鏖戰之功頗獲款降之衆忠勇如此嘆嘉久之尙益謹于折衝俾少寬于軫慮爰因來使申諭至懷

鎮潼軍官吏軍民道士僧尼耆壽等示諭敕書

朕以孟忠厚太母近親中朝雋望蚤參華于法從旋疏渥于齋壇比緣慈壺之傾欲厚外家之報相攸吉壤庸

示湛恩乃升槐鼎之聯移鎮河山之會想汝提封之衆
知吾懿戚之臨將芘其休溥同茲慶今特授孟忠厚起
復鎮潼軍節度使開府儀同三司充醴泉觀使進封東
海郡開國侯加食邑五百戶食實封二百戶故茲示諭
想宜知悉

潭州呂吏軍民等撫恤敕書

朕惟強寇憑陵東南震擾長驅騎塹奄及湘城方薄壘
以來攻至淹辰而靡息爾等明于分義屬此艱危雖巧
讒之百端終堅持于壹意逮金湯之失守猶夙夜以輸

關槐

忠躬履軍鋒冒之極口力爲巷戰奮以忘軀因奏牘之
來陳想忠誠而嘉歎

臨安府民兵撫恤敕書

敕臨安府民兵等省本府奏自金人攻陷府城內外民
兵併力拒敵血戰五日方始城破又緣諸縣村保防護
嚴密往往多被掩殺緣此怨恨臨行之日焚燒屋宇城
郭一空比之其他殘破州郡被禍尤酷實可痛惻欲望
優加撫恤事朕惟左衽之憑陵奄及東吳之都會爾等
挺身禦敵爲國忘生率其忠義之豪挫彼侵陵之暴逮

逾累日方失堅城凡分塢壁之屯皆奮兵戈之銳緣茲
厚毒爲我深仇洎敵騎之旋歸舉民居而焚蕩靡思人
怨而神怒惟務井堙而木刊言念吾民重罹此禍眷瘡
痍之未復每寤寐以興嗟已遣守臣往宣恩意其各從
于安集以同待于承平故茲撫恤想宜知悉

福建路轉運提刑獎諭敕書

朕比緣國步之艱越至海隅之阻爾等忠能體國志在
紓邦前期哀經賦之常倍道助行朝之費憂思及此嘉
歎久之

蔡州官吏軍民等獎諭敕書

朕惟釁發強鄰祲纏中國凡版圖之生齒皆魚肉于兵
戈爾等雖隔朝廷各懷忠藎堅一心而胥誓保千里之
提封遠慕王靈來輸誠款譬橫流奔潰終砥柱之不移
如烈火方炎獨精金之常在載觀敷叙良用歎嘉

興國軍知通以下軍兵將佐獎諭敕書

敕興國軍知通以下軍兵將佐等省李宜申汝等願以
死守盡節君親遂得一境安帖悉無二心以免殘破事
比者敵兵犯吾江介繹騷千里旣恃衆以阻威震動列

城多望風而毀節爾等天資忠義志在君親雖巧說之
百端終堅持于一意顯誅來使卒保提封唐郡皆降惟
平原之能守齊城旣下恃卽墨以復興惟爾之功何慙
于古載披來奏良用歎嘉

荆南府唐愨獎諭敕書

朕申儆邊虞載除戎器將兼收于方貢用大振于軍聲
爾才裕守藩誠深體國首備方船之載豫期給仗之頒
旗幟精明有周帛織文之盛戈鋌犀利得楚金工冶之
良緬想忠勤不忘嘉歎

萊州張成進天申節禮物金銀獎諭敕書

朕惟東萊隔絕于兵久不爲郡乃紀誕彌之月遠輸貢
篚之珍自非誠悃之確然安能駿奔而至此載觀來奏
嘉歎久之

朝散郎提舉淮南西路茶鹽公事許大年并本司
官屬獎諭敕書

迺者烟塵蔽于淮甸分塗并進破壘相望凡當寇虐之
衝鮮保忠誠之節士而至此朕甚傷之爾等或領國使
華或爲人官屬雖遇稽天之暴訖無離局之私敷奏旣

聞歎嘉何已

神武前軍統制王瓚等獎諭敕書

敕王瓚等省所狀生擒胡少隆胡木香解赴朝廷事具
悉迺者姦宄之民干吾典憲爾等忠于許國聞命遄驅
奮當軍鋒如報私忿擒其魁宿曾不淹辰坐令一方按
堵如故載披來奏良用歎嘉

賜范溫等獎諭敕書

敕范溫等省所奏契勘金兵初渡黃河溫等便遁居牢
山繼聞本路投順遂集忠義乘船入海據守福島山東

既下北軍于登州黃縣萊州小高濰川昌邑密州鑿山
及泲膠河兩岸深溝高壘分屯人馬督責州縣括刷錢
糧討擄鄉村拘牧牛馬老稚離散田野荒蕪民不聊生
無以赴愬温等雖尋常上岸或稍綽遊騎或攻刦營寨
勦殺多人誓竭忠節本軍凡遇金人接戰內有得功之
人別無犒賞遂量功績逐急借補加轉官資伏望將已
借補之人給付告劄補正官資事具悉朕惟強寇長驅
全齊不守凡妖氛之所被如滄海之橫流汝志存忠誠
恥附汙逆乃前期而避銳徑率衆以乘危隔絕朝廷荐

更歲籥偶使燼之及境附奏牘以披誠志節如斯古今誰及爰峻加于爾秩仍徧錄于有功其共復于予封以卒成于汝志

獎諭審刑院詳議官大理寺詳斷官

敕趙文昌等省知審刑院齊恢奏據大理寺日奏司狀四月以前下寺公案並已斷絕無見在事朕初嗣服德化未孚永念元元多罹犴獄汝等並膺選擢任茲讞疑能勵厥官以無留事覽奏歎尚不忘于懷

浮溪集卷十六

關槐

浮溪集卷十七

宋 汪

藻

撰

諡議

恭上隆祐皇太后諡議

臣伏奉敕命禮部狀據太常寺申今來大行隆祐皇太后崩合差諡議官差臣撰諡議者臣謹上議曰臣聞承天者地也所以函六氣而熙歲功配陽者陰也所以分四時而成物化儷宸極者后也所以奉宗社而隆化基故古之母儀天下者生也薦之尊名終而述其大行三

代尚矣靡得而詳在漢則明德和熹著稱于前在唐則
文德懿安垂紀于後皆所以揭椒塗之範炳彤管之輝
巍巍乎與帝德竝隆不可貶已洪惟大行隆祐皇太后
躬聖善之德茂柔明之資粵自先正魏王有功仁祖之
世王室所賴旂常紀之其澤深慶綿用集我太母惟我
太母基迹元祐嬪于泰陵逮事宣仁欽聖兩宮稟二南
之規兼四教之善正位宮掖三十餘年含洪廣大而體
坤道之常進退存亡而得聖人之正及靖康初載天割
我家二帝出郊中原無統列辟相視莫知所圖我太母

起于危疑之中自任以天下之重手援大寶授之聖明
當方隅傾側之時序璇歷纂承之次雖文母以十亂興
周不能過也已而六飛南渡按蹕武林元凶闖朝宄自
內作天下之勢甚于綴旒我太后投袂而履禍機立談
而銷逆祲坐使天地復正三辰復明四方元元悉免塗
炭雖媧皇以鍊石補天不能過也旣勲猷崇極如此而
乃抑華敦儉率禮蹈和塞私謁之塗裁外家之寵清淨
謙沖而以道爲本沈潛剛克而與神爲謀擁佑聖躬殫
誠盡愛煌煌乎度越麟趾思齊之上矣方期清我甸服

駕旋舊京虔奉翟車謁款宗廟極四海之養卽東朝之
安而昊天不辰禍結慈極親蠶告畢方開盛夏之祥隙
駟難留遽揜長秋之御茲天子追慕悼心失圖歎厚載
之中傾痛仙遊之不返雖遂服不可勉從朞歲之喪而
興哀無時每過舉音之節由是命有司攷易名之典懋
節終之儀告于神明節以四惠庶幾有以彰淑則而暢
徽音謹按謚法明德有功曰昭視民如子曰慈聰明睿
智曰獻安民有功曰烈若乃兩值時變當陽御簾基圖
旣安卽復明辟澤及萬世與天無窮非明德有功耶寢

開

興焦勞言動懇惻冒風濤兵革之險濟宇宙生靈之艱
非視民如子耶察興替之端知變通之利親庶政以任
溥天之責奉真人以膺神器之歸非聰明睿智耶中微
之緒而我振之大亂之原而我窒之從容房帷密幹鴻
造非安民有功耶嗚呼道之大者理謝形容名之尊者
言絕稱謂故古者賤不誅貴幼不誅長而皇后之諡則
請之于廟示雖天子必有尊也況我太后盛德元功實
無前比豈承學之臣所能擬議意者必受成于宗廟爲
足以對在天之靈大行隆祐皇太后諡議宜以祖宗之

命錫之曰昭慈獻烈皇后臣謹議

策問

試館職策題一首

問王者之有天下。一曰創業。二曰守文。三曰中興。而議者以守文爲易。創業次之。中興爲難。周之宣王。漢之光武。晉之元帝。唐之肅代。皆中興之君也。其一時所用豪傑。國家恃以爲廢興存亡者。蓋粲然于今。有不可揜者矣。宣王所任者仲山甫。光武所任者鄧禹。元帝所任者王導。而肅代無聞焉。然唐卒復舊物。與周漢竝隆。而元

帝立國之基顧反不及之者何也或謂唐所以中興者
李光弼郭子儀之功然是二臣者皆武夫提兵未嘗得
預廟謨之勝者也亦可與仲山甫鄧禹王導比耶光武
之諸將未必皆爲李郭下者而後世以再造漢室禹爲
元勳觀禹暮年威望亦少損矣而耿賈吳祭之徒卒不
敢與之齒者豈有說乎主上系隆大統求賢如不及將
屈羣策復中原凡在朝廷者于康濟之畫所當講求而
獻也敢問四代之君任人之方與其將相救時之術孰
得孰失孰可以爲法于今孰于當時有遺恨而可爲後

世鑒者願悉著于篇毋隱

序跋

題說書
後附

蘇魏公集序

所貴于文者以能明當世之務達羣倫之情使千載之下讀之者如出乎其時如見其人也若夫善立言者不然文雖同乎人而其所以爲文有非人之所得而同者孟子七篇之書敘戰國諸侯之事與夫梁齊君臣之語其辭極于辯博若無以異乎戰國之文也揚子之書數萬言言秦漢之際爲最詳簡雅而閎深若無以異乎西

漢之文也至其推性命之隱發天人之微粹然一歸于
正使學者師用比之六經則當時所謂儀秦谷永杜欽
輩豈惟無以望其門牆殆冠履之不侔也宋興百餘年
文章之變屢矣楊文公倡之于前歐陽文忠公繼之于
後至元豐元祐間斯文幾于古而無遺恨矣蓋吾宋極
盛之時也于是丞相魏國蘇公出焉以博學洽聞名重
天下者五十餘年卒用儒宗位宰相一時高文大冊悉
出其手故自熙寧以來國家大號令朝廷大議論莫不
于公文見之然公事四帝以名節始終其見于文者豈

空言哉論政之得失則開陳反覆而極于忠論民之利病則援據該詳而本于恕有所不言則已既言于上矣舉天下榮辱是非莫能移其所守可謂大臣以道事君者也若其講明經術之要練達朝廷之儀下至百家九流律歷方技之書無不探其源綜其妙者在公特餘事耳此所以一話言一章句皆足以垂世立教革澆浮而已媮薄與軻雄之書百世相望而非當時翰墨名家者所能彷彿也公元豐中受詔爲華夷魯衛錄書成序之以獻神宗讀之曰說卦文也今攷其書信然則公之他

文可知矣公歿四十年公之子攜始克集公遺文得詩若干內外制若干表奏章疏誌銘雜說若干使藻預觀焉藻少習公文以不獲拜公爲恨者也今乃盡得其書讀之可謂幸矣故謹識其端而歸其書于蘇氏紹興九年三月十五日顯謨閣學士左中大夫提舉江州太平觀汪藻序

吳園先生春秋指南序

六經惟春秋爲仲尼作聖人見其所志之書也學而不明乎是非何以爲人治而不明乎賞刑何以爲國此書

之所以作而爲萬世法也雖曰以匹夫而行天子事有所謂婉而成章者然其褒貶一出乎天下是非之公豈故爲殊絕甚高之論使後人有不可及之歎哉不知班固何所受之立爲弟子退而異言之說開後世諸儒相詬病之端使當時誠有異同不應復云游夏之徒不能贊一辭也孟子去孔子百餘年于書武成詩雲漢莫不疑之至春秋則曰詩亡然後春秋作孔子成春秋而亂臣賊子懼知我者春秋罪我者春秋而已未嘗片言置疑于其間也彼亂臣賊子者豈曉然知道理之人哉一

開

見春秋而知懼焉非懼聖人之書也懼天下是非之公也自三傳興而聖人之經始不勝其繁好異者曰聖人之言窅然幽深必有不可以近情常理度者當冥思而力探之于是枝葉蕃滋無所不至人人務其已說之勝而莫知求至當之歸乃至子而以父學爲非弟子而以師說爲愚況其他哉則春秋不明三傳亂之也本朝自熙寧以來學者廢春秋不用數十年間篤學而好之者蓋不爲無人然一時章分句析之學勝故雖春秋亦穿鑿破碎而不見聖人之渾全政和間余過山陽吳園先

生張公在焉先生謂余曰學春秋而不編年無以學爲也吾嘗以諸國縱橫列而類見之聖人之意了然矣當令子見吾書余未及受而先生亡未幾先生之書盛行于士大夫間因得伏而讀之曰嗟乎聖人之意豈遠人哉曲學蔽之耳先生閉戶讀書二十餘年其見于世者固已碩大光明而所出裁一二而已則求聖人之心而得之者豈獨此書哉雖然以此書攷之先生之志亦可以槩見矣紹興十年七月門人汪藻序

鮑吏部集序

括蒼鮑欽止既卒若干年其子延祖始哀欽止之詩爲
小集若干卷屬藻序藻爲之言曰古之作者無意于文
也理至而文則隨之如印印泥如風行水上縱橫錯綜
燦然而成者夫豈待繩削而後合哉六經之書皆是物
也逮左氏傳春秋屈原作離騷始以文自成一而
稍與經分漢公孫弘董仲舒蕭望之匡衡以經術顯者
也司馬遷相如枚乘王褒以文章著者也當是時已不
能合而爲一況凌夷至于後世流別而爲六七靡靡然
入于流連光景之文哉其去經也遠矣本朝自熙寧元

豐士以談經相高而黜雕蟲篆刻之習庶幾其復古矣
然學者用意太過文章之氣日衰欽止少從王氏學又
嘗見眉山蘇公故其文汪洋閎肆粹然一本于經而筆
力豪放自見于馳騁之間深入墨客騷人之域于二者
可謂兼之自黃魯直張文潛沒欽止之詩文獨行于世
而詩尤高妙清新每一篇出土大夫口相傳以熟余嘗
恨未見其全書晚得此集讀之曰嗟乎欽止于斯文可
謂毫髮無遺憾矣欽止諱慎由欽止其字也風度凝遠
如晉宋間人談笑風生坐者皆屈家藏書萬餘卷率手

開

下雌黃非讎得其真不止故當時諸公交口稱譽且論
薦之崇寧中天子召見者數人上獨偉視欽止卽日除
尚書郎居無何不合去出爲郡守部使者久之方嚮用
欽止而欽止以疾廢于家矣故士大夫莫不惜其才不
克施而見于世者特詩文而已也故錄欽止之生平大
槩而併見之

呻吟集序

造物者輕與人以富貴壽考而重與人以令名自古富
貴未嘗一日無人久生而長世者亦每每有之率迥然

與草木俱腐世初不知其嘗有是人也以童鳥也而天以王輔嗣衛叔寶也而天以李元賓李長吉也而天是數子皆天才卓超非偶然而生游戲須臾之間已暴白于世如此較之久生長世者大都不過數十年之頃耳彼今安在哉而貽聲名以資說士者炳然至今雖垂之無窮可也使數子復生肯以此易彼乎元祐初異人輩出蓋本朝文物全盛之時也邢敦夫于是時以童子游諸公間爲蘇東坡之客黃魯直張文潛秦少游晁无咎之友鮮于大受陳無已李文叔皆屈輩行與之交雖不

幸短年而東坡以爲足以藉手見古人魯直以爲足以不朽无咎以爲足以追逐古人今呻吟集是也敦夫卒六十餘年而其姪總出此書于是敦夫之詩文盛行于時與黃秦晁張並傳信諸公許可爲知言也嗚呼敦夫尙何求哉得此不悼不幸于土中矣

胡先生言行錄序

自孔子沒諸儒以學名家固無世無人而其間必有卓然名世者德與言稱當時師之後世尊之以漢四百年所得者揚雄以唐三百年所得者韓愈如董仲舒鄭康

成王通孔穎達之徒非無益于後世也仲舒倡災祥之說王通襲聖人之迹康成穎達守區區訓詁之文學者疑焉此二子所以巋然獨爲後世宗也宋興八十餘年至慶歷皇祐間儒學無愧于古矣當時學者以泰山孫明復徂徠石守道海陵胡先生爲師而先生之門爲最盛弟子各以其經轉相傳授常數百人仁義禮樂之風藹然被乎東南公卿偉人由先生之門而出者接踵于時蓋數十年未已也熙寧以來學者非王氏不宗而先生之學不絕如綫矣然識者知其必興逮今天子一新

關

斯文力去黨錮之弊訪先生之後得其孫滌而官之繇
是先生之學復振耀流通人人讀先生之書如慶歷皇
祐時先生雖嘗再至京師爲太學官侍經天章閣而教
授吳興爲最久其建太學京師也又嘗下吳興取先生
之法爲法則吳興者先生之洙泗也紹興八年錢塘關
注子東主吳興學而先生之孫滌在焉相與哀先生遺
書將以布之天下慰學者之思得先生易書若干篇中
庸義若干篇旣藏之學宮矣又錄先生言行若干條爲
一帙孟子曰君子之澤五世而斬小人之澤五世而斬

予未得爲孔子徒也言君子小人雖賢否不同而澤之
所施同乎有盡惟義理之在人心爲無窮雖傳之百世
可也則先生之學復行固宜然子東所以求先生之書
者豈徒爲循誦習傳而已哉將以美風俗新人材于是
乎在可謂知先生所以望後世之意者矣紹興十年七
月汪藻序

題竹林七賢圖

竹林七賢西晉之士也獨山濤王戎仕顯餘悉以其志
終七賢之在晉猶管寧華歆邴原之在魏也士賤華歆

邴原而貴管寧者以遁跡遼東不立魏朝七賢高蹈竹林無愧于寧矣顏延年五君詠不數山王者豈無意哉此畫奇甚決非近世所能爲恨不得其人必有能辨之者

書陳文惠公逸事後

文惠陳公相仁祖每內批夜漏下不過十刻忽夜分有御封至私第公不啓封來日袖至榻前屏奏曰今中宮虛位張貴妃有寵恐姦人附會請正母儀非陛下本意有不得已者若誠此事臣不敢啓封以示同列仁祖首

肯曰姑置之妃卽追冊溫成后也當時于墓刻神道碑
不敢書公薨百餘年公之曾孫右中大夫直秘閣亮始
錄以示人嗚呼茲舉也天下之治亂繫焉文惠公不動
聲色開悟轉移于談笑之頃一旦致其主于漢唐君之
上使當時有秋毫容悅之心其失可勝計哉可謂仁人
之言而一言興邦矣自古妃匹之愛父不能得之子君
不能得之臣所謂難言骨肉之間者也文惠公及此固
社稷之臣非吾仁祖有從諫之聖亦安能容其臣如是
之大乎後世于此可以觀一時君臣之盛而爲萬世法

開

矣紹興十年十二月臣汪藻書

柯山張文潛集書後

右文潛詩千一百六十有四序記論誌文贊等又百八十有四第爲三十卷余嘗患世傳文潛詩文人人殊屏居毗陵因得從士大夫借其所藏聚而校之去其複重定爲此書皆可繕寫文潛名未譙郡人仕至起居舍人嘗爲宣潤汝潁堯五州太守又嘗謫居黃州復州最後居陳以歿其集以鴻軒柯山爲名者居復黃時所作也元祐中兩蘇公以文倡天下從之游者公與黃魯直秦

少游晁无咎號四學士而文潛之年爲最少公于詩文兼長雖當時鮮復公比兩蘇公諸學士旣相繼以歿公歸然獨存故詩文傳于世者尤多若其體製敷腴音節疎亮則後之學公者皆莫能彷彿公詩晚更效白樂天體而世之淺易者往往以此亂真皆棄而不取其采獲之遺者自如別錄云

跋東原集序

嘉祐六年先人爲泰興令歲大水民田與江通無從得食轉運使督秋輸不少貸諸縣皇恐聽命獨先人哀其

窮悉蠲之轉運使大怒文移如星火先人處之自如也
其冬事聞詔起居舍人同知諫院龔公鼎臣安撫淮南
至泰州部使者皆從公立諸縣令庭下數之曰人飢不
能自存而汝必得租爲民父母當如是乎泰興令可尚
也乃會部使者郡守食堂上泰興令預焉且使交章薦
之藻爲兒童時記先人之言如此恨不知龔公出處之
詳後六十年至零陵得學易先生所書集序讀之歎曰
龔公千載人也因知士欲行其志非得大君子無所知
名反獲戾焉者有之況交薦之幸哉公于是能舉直錯

諸枉矣紹興二十一年三月男藻書

跋折樞密錦屏山堂圖

葆真居士小築于壽安錦屏山中趙祖文因畫居士泉石間以示其人物風流濟勝之具傳之江南人人把玩悠然想見其處并想見其人便覺斜川輞川去人不遠也

跋唐司農遇仙事

世傳陳希夷引一貴人見麻衣道者曰神仙無此骨也止堪作貴公卿耳蓋氣清而純陽者爲神仙世人冒役

開

于聲利爲積陰所乘何暇說遙興輕舉之事哉惟忠義
凜然視死生如脫屣功行旣滿必有不同乎人者仙者
識之

跋鄭天和臨右丞樵舍秋晴圖

空如非能畫也胸中丘壑微見筆端而瑰偉絕人如此
世間畫史取青媿白求象似于毫髮豈復有林巒湖海
真趣耶

跋葉擇甫李伯時畫

若人云亡畫筆中絕使杜少陵見之當復有鄭公長夜

之歎耶宣和元年六月鄱陽汪藻借觀于寧國傳舍宣和初余通守宣城時擇甫官寧國出此畫書其後比自泉南移宣城過福唐擇甫復以示余則二十五年矣一見如隔生事爲感歎久之紹興癸亥季春朔新安汪藻書

長興周如愚殖齋說

余少時喜之壟上與知田者語其始過焉苗之芃芃然者若孺子之起而欲立也其再過焉稼之嶷嶷然者若成人之愿而欲進也三過焉穡之肅肅然者若壯夫之

開

材而欲試也于是余三過而三有得焉曰嗟乎物化之
速也如是哉其天時地利之得乎農者曰吾于此致力
焉進乎天時地利矣吾自土膏之作未嘗食頃舍田而
嬉于孺子也懼其仆日再視焉于成人也懼其汨日三
視焉于壯夫也懼其搖日五視焉天時有雨暘雨之過
也能腐之暘之過也能槁之吾而節之以畎澮之盈虛
地利有肥瘠肥之過也能淫之瘠之過也能耗之吾而
時之以菑畲之深淺于是乎有稂莠之傷螟螣之裁吾
認認然防之甚于盜賊之操戈入吾室也故吾常得歲

焉良農之耕其穫三勤也常農之耕其穫半怠也吾力
田于茲數世矣而未嘗知水毀木饑火旱之變汪子聞
而嘆曰善哉吾聞力田而得學者日新之道焉閔子馬
曰學殖也豈欺余哉長興周如愚闢便坐于其居之旁
而求名于余蓋有志于學者故余篆其楣曰殖齋而并
書其說以告之

浮溪集卷十七

關
化
u a t h u a

浮溪集卷十八

宋

汪

藻

撰

記

范文正公祠堂記

孟子之言氣曰至大至剛以直養而無害則塞乎天地之間夫直之爲言大公至正之道也以大公至正之道固守而力行之不爲富貴貧賤威武之所搖奪雖乘田委吏之卑亦必盡吾誠充吾職卒而至于立國家定社稷安邊境服羌戎其功烈與日月爭光而精神折衝萬

里之外謂之氣塞乎天地之間可也後世見古人功名
之盛以爲類出于偶然不知公正素定于胸中者未嘗
無所從來而其銘鼎彝書竹帛者非一日之積也文正
范公自未第時已慨然有天下之志不以死生禍福動
其心逮遭明天子有爲于時其立朝如史魚汲黯其憂
國如賈誼劉向其守邊如馬伏波羊叔子雖庸人孺子
莫不知之獨筮仕之初有卓然大過人者國史失其傳
故不得而不紀也公以進士釋褐爲廣德軍司理參軍
日抱獄具與太守爭是非守數以盛怒臨公公未嘗少

開

撓歸必記其往復辨論之語于屏上比去至字無所容
貧止一馬鬻馬徒步而歸非明于所養者能如是乎獄
官有亭以公名之者舊矣公卒二十年而高郵孫覺莘
老爲廣德軍始以詩志公之事而刻之亭中又六十九
年丹陽洪興祖慶善來守讀莘老之詩而慕之初廣德
人未知學公得名士三人爲之師于是郡人之擢進士
第者相繼于時慶善乃求公遺像繪而置之學宮使學
者世祀之而屬余記其事嗚呼公之盛德豈待文而後
傳而藻亦豈記公者哉昔段秀實盡忠于唐世徒以爲

一時奮取功名之人而不知居官必有可書之事柳宗元爲撫其實上之史官今所以知段太尉逸事者宗元發之也秀實固不足以擬公而余幸從慶善得公之詳與夫徵夏無且畫工爲無所愧安知後世不採此以補史官之闕乎然慶善爲政而首及公可謂知所本矣柔亦不茹剛亦不吐文正公有焉好賢如緇衣慶善有焉其不可以不書紹興九年六月記

嚴州高風堂記

古之王者取天下而天下歸之蓋其功成志得之時也

開

以功成志得而視士大夫皆可以爵祿致必有輕天下之心于是巖穴之間有人主不得而臣者出焉以唐堯之聖猶不能屈潁陽之高況其他哉夫士之所以自重如此非區區爲其身謀也于以厲世則百年之風俗繫焉漢之二祖皆以布衣取天下高祖之時有若東園公綺里季夏黃公角里先生世祖時有若嚴子陵皆人主不得而臣者也園綺四人避秦之亂入商雒山待天下之定以高祖輕士善罵義不爲漢臣帝雖高此四人召之莫能致也嚴子陵亦厭新室之暴不肯辱其身逮光

武立猶披羊裘釣澤中雖三聘僅能一致而卒不爲帝
留是五人者其出處豈不相類哉然園綺之徒晚從太
子之招爲太子畫自安之策正國本于談笑而史不記
其所終故西漢之士聞其風而慕之者以計行爲得而
風節減于功名子陵本帝故人旣物色求之而來高臥
不朝帝爲親幸其館漠然不應譙三公若奴隸然望印
綬麾而去之終其身退耕于野故東漢之士聞其風而
慕之者尙風節而以功名爲不足道大抵園綺之徒學
伊尹子陵學伯夷伊尹耕于有莘之野曰我何以湯之

關

聘幣爲哉卒以憂世幡然而從湯伯夷遭周武王之君
猶以爲薄竟不食粟餓死首陽之山故孟子曰伯夷聖
之清伊尹聖之任又曰聞伯夷之風頑夫廉懦夫有立
志子陵世家富春旣歸耕于家後人名其釣處爲嚴陵
瀨奉祠千餘年不衰今釣瀨并臺俱存而富春之境析
爲嚴州紹興七年吾友董弁令昇爲是州朞年政成乃
爲堂于州治之左日從賓客觴詠其上而名之曰高風
以景慕子陵之賢且立文正范公所述祠堂之碑于其
旁而求予文爲記令昇可謂能尙友千古矣令昇清介

有守觀其所慕足以知其爲人故余述子陵出處大概以告令昇而使并刻之紹興九年六月記

翠微堂記

山林之樂士大夫知其可樂者多矣而莫能有其有焉者率樵夫野叟川居谷汲之人而又不知其所以爲樂惟高人逸士自甘于寂寞之濱長往而不顧者爲足以得之然自漢以來士之遁迹求志者不可勝數其能甘心丘壑使後世聞之翛然想念其處者亦無幾人豈方寄味無味自適其適而不暇以語世耶至陶淵明謝康

開

樂王摩詰之徒始窮探極討盡山水之趣納萬境于胸
中凡林霏空翠之過乎日泉聲鳥哢之屬乎耳風雲霧
雨縱橫合散于沖融杳靄之間而有感于吾心者皆取
之以爲詩酒之用蓋方其自得于言意之表也雖宇宙
之大終古之遠其間治亂興廢是非得失變幻萬方日
陳于前者皆不足以累吾之真故古人有貴于山水之
樂者如此豈與夫槁項黃馘欺世眩俗者同年而語哉
吾宗發之以豪自喜讀書彊記談笑多聞頗欲以事業
文章見世一旦悉棄去不學學所以治心養性者買田

三靈山之陽前瞰大川旁眺諸嶺築翠微堂以居藝蘭
種竹其下日與賓客飲酒賦詩徘徊周覽蓋將老焉其
意以謂世之有聲有色者未有不爭而得亦未有不終
磨滅者惟山水之娛人無事于爭且庶幾可以長存故
吾有以取之蓋不學淵明而暗與之合余旣以仕爲家
老于憂患引領林泉有不可及之嘆而發之沈酣饜飫
且十年于茲矣盍求其餘結茅翠微之側以休吾老乎
吾恐發之不得擅而有也故遺書以問之若夫山間之
四時朝暮可喜可愕他日與發之共之者酒杯流行尚

開

能賦其一二爲翠微故事茲不復敘云

畫繡堂記

自古人物與山川相爲輕重崧嶽生甫申淇澳生衛武
山東出相山西出將此人物以山川爲重也莘野以伊
尹聞磻溪以呂望聞隆中繇諸葛亮而顯曲江繇張九
齡而大此山川以人物爲重也故爲名山大川者不以
生明堂大輅之材九鼎之金照乘之珠連城之璧爲貴
而以毓英賢爲貴爲王公大人者不以功業載旂常銘
鐘鼎書竹帛流管絃爲榮而以歸故鄉爲榮此古人所

謂富貴而不歸故鄉如衣繡夜行者言得志而行乎四方人孰見之必至吾父母之邦然後爲可樂也新安自吳爲郡今千餘年山水峭厲而清深故長材秀民之出視東南爲最繇唐以來擢高科登顯仕者固不爲無人然未有居將相之位者也宋興百七十年而大丞相汪公出焉公以諸生徒步起家于京師數千里之外爲時偉人遭明天子艱難之中總州符入侍出奇謀秘策以輔成中興之功遂自樞臣相天子其精忠如金石赫然爲佐命元勳而新安之名一日聞于天下此新安之榮

開

也豈獨公之榮哉紹興九年公自七閩入覲以保信之
節來鎮宣城宣城新安鄱陽三州相望皆百餘里公乃
卜居鄱水之上將歸老焉建畫繡之堂而命藻記之藻
曰公以邁往之資應期遇運乘風雲依日月而正宇宙
于立談之間雖釋位而去者十年天子未嘗一日忘公
也乃建旄秉鉞而兼師傅之官亦可謂布衣之極矣公
今七十餘精明如五十許人將復三居廊廟坐籌帷幄
取河朔山東六十餘州歸職方圖籍奉乘輿還宮闕然
後退從赤松子之游其功名益新則新安之名益大藻

將不一書而爲天下國家慶也又豈特爲新安之榮而已哉

虔州神惠廟記

政和二年江南西路轉運副使臣臨臣根提點刑獄臣景修提舉學事臣聞提舉常平臣邁言惟虔州地卑薄章貢水出其中洩發不時輒冒城郭敗廬舍民之仰食于田者戶十萬俗皆窳無隄防畎澮之儲歲時豐凶以雨爲節故十縣方千里常以旱乾水溢爲憂惟靈順昭應安濟王廟在洪州吳城山別祠之隸虔者三負城之

開

西北隅者尤絕顯異政和元年四月水至城下丈餘雨
晝夜不止吏民惴恐臣景修率官屬禱祠下輒應越六
月民穡在田天則不雨有艱食之憂臣景修又禱則又
應暨冬鹽筴之役興而常暘涸流舟不得漕臣根又禱
則又應臣等竊伏思雨暘天事雖有智者莫能力致今
乃取必于神如責券探囊無不如意民旣足食樂生重
犯法得以其力出賦租給公上而吏亦因此省治訟興
事功是神有功于國甚著有德于民甚厚雖三被封爵
之崇而像設不嚴名號不新無以揭虔妥靈願詔有司

議所以褒崇俾民奉承永遠無怠臣等謹昧死請制曰
可其以神惠爲廟號初提點刑獄張公治虔嘉神之休
徯上之賜而致民之思也乃卽故基築宮而大之土木
之功崇庠叶中丹堊之飾華質合度于是神降廟之筵
門委蛇蜿蜒顧享牲酒屈伸中儀及廟成而命書至邦
人駿奔相屬于道公遂命藻記其事藻以爲古之王天
下者出命令主神人明則職之人幽則職之神各致其
能無相瀆也故人之能興利除弊者時則賜之明神之
能致福弭災者時則錫之幽有顯號徽稱以昭明也屬

開

之祠官世世不絕謂之報功宋受命極天所覆罔不臣
妾上方以道德懷柔百神肆虔之爲州去京師數千里
而神之受職如躬壇場之間手圭幣之薦者雖王之威
神南放洞庭西及淮沔可謂盛大亦不敢以遐方爲間
服天子之寵靈而部使者又能悉條其功請命于朝夸
大顯融垂示無極是三者皆可書也藻敢以固陋爲辭
乃作詩曰帝受天命悉主百神假神之休以錫爾民惟
此南服介于大川負江而城卽山而田十日而雨民憂
爲魚十日而暘時則狼顧雨暘在天人則必之匪人之

能神則節之嗟嗟神龍執造物權變化莫測恩威在顏
寵靈自天惟帝之渥我新宮顛民所作酒牲在堂神
則戾止蜿蜒誄信陳乎燕几惟王威神永有此都屏翳
陪後風伯前驅厲鬼螟螣卻除不祥俾我遠疇躋于樂
康迄千萬年保茲崇極享帝之誠是謂受職

洪州右獄盡心堂記

世稱臯陶以刑事舜其後封于蓼六至春秋時其國先
亡以爲用刑者之戒余獨以爲不然漢于公袁安郭躬
皆以決獄陰功遺福子孫至取卿相封侯累世孰謂臯

開

陶明允篤誠而以刑之祀哉蓋君子常患澤不得施與
施焉不遽及物若持法之平司人之命不擇位小大皆
得以行其志者惟刑爲然使吾聽訟如召伯折獄如子
路哀矜如曾子君子怙焉小人懼焉雖世世獲福可也
然君子亦豈先慮己禍福議人之生死哉期無愧而已
矣吾友蕭適用恢疎樂易人也始吾與之游得溫厚之
氣于眉睫間每訊報爰書不以諉吏平反決讞必以其
情諸罹文法者皆不恨余知其以刑受福也他日斲廢
圍立屋數楹列美蔭于前爲亭對峙而求說于余余以

爲王制刑者例也一成而不可變故君子盡心焉禹思天下之溺猶己溺之稷思天下之飢猶己飢之蓋古之君子于人無所不用其志今吾與子一杯相屬于此亦思有向隅悲泣滿堂爲之不樂者乎亦思有箠楚之下何求而不得者乎亦思有禁繫之中寒不得衣飢不得食者乎古之循吏鮮不以仁成名酷吏鮮不以刑取禍輕視民命以喜怒行之幾何其不挽弓自射也故余書以遺適用并告後之君子毋爲捨福取禍必無愧于心然後可以樂此

開

u a r h

鎮江府月觀記

京口以江山名天下其來尚矣而爲國屏蔽尤重于晉
宋齊梁之間觀其千嶂所環中橫巨浸風濤日夜駕百
川而東之其形勢之雄實足以控制南北豈直爲騷人
羈客區區登覽之勝哉州治之西有樓焉並城而出名
曰千秋者攷諸圖志始于晉王恭之時繇樓西南循城
百餘步忽飛簷曲檻峯然孤起于城隅之上望數百里
見之者可觀也紹興八年吳興劉岑季高來刺是州州
承廢亂之後公私掃地無復故時季高以精明彊敏之

才易民觀瞻于談笑之頃旣府寺閭井鳩集經營悉復其初始暇遑于游息之地乃卽月觀之址輯而新之客有登而嘆曰嗚呼壯哉未之見也前此頽薨圯棟蕪沒于蒼煙灌莽之中雖江山不與時變遷者亦莫吾覲今晨霏夕靄晴嵐暖翠復得于几席之上而風颿浪舶離鴻落鶩畢陳于尊俎之前如客得歸如蒙得發也季高于此可謂能矣非政有餘力能致是哉或曰是未足言季高之政也季高勞于侍從之事出分天子顧憂方時艱難此州實爲襟要其經理規模必有足大者嘗與予

開

Ua

四顧而望之其東曰海門鴟夷子皮之所從逝也其西
曰瓜步魏佛狸之所嘗至也若其北廣陵則謝太傅之
所築埭而居而江之中流則祖豫州之所擊楫而誓也
計其一時英雄慷慨憤中原之未復寇敵之未擒欲吞
之以忠義之氣雖狹宇宙而隘九州自其胷中所積亦
江山有以發之今攬而納諸數楹之地使千載之事了
然在吾目中則季高之志可知矣然自有天地則有山
川其閱人多矣而山川勝處非人不傳襄陽峴首以羊
叔子傳武昌南樓以庾元規傳蜀之籌筆驛以諸葛武

侯傳吾知月觀與季高之名籍籍天下矣爲書其本末以補京口故事之遺使後人知此觀復新自吾季高始豈不益可喜耶季高曰可哉紹興九年十一月記

何氏書堂記

吳興環城皆水獨西南岡嶺相屬十餘里而得浮圖氏之居二焉東曰道場西曰何山何山立于宋元嘉中道場近出于唐末五季之初然道場踵相躡得人法席雄盛鐘魚殷殷聲聞東南何山敗屋數椽殘僧數輩望之蕭然游者弗顧也雖其興先道場五百餘年而衰陋反

開

ka

出其下遠甚紹興初余守吳興得二禪老曰慧林曰居
慧使分居二山慧居何山數年剪薙榛蕪易其圯腐而
一新之于是游道場者如入王侯之家其隆樓傑閣足
以吞光景而納江湖已而過何山則草樹葱蘢軒窗窈
窕經行之地皆雅潔幽深如造幽人隱士之廬至者忘
歸不知雄盛移而爲清勝也寺有何氏書堂圖記相承
以何氏爲晉何楷楷嘗讀書此山後爲吳興太守以其
居爲寺而名其山顏魯公書杼山碑亦曰寺西南有何
楷釣臺則楷嘗居此山無疑然楷之姓名于晉史無所

見惟宋書言何子平曾祖楷爲晉侍中而已唐林寶姓纂亦云何叡渡江生楷爲晉侍中晉書稱叡有子五人獨充準有傳而不及其餘又括地志謂楷爲吳興太守宋書乃以楷爲晉侍中豈沈約見晉書充嘗除侍中因誤謂充爲楷抑爲吳興太守後亦至侍中耶皆不得而知也以余攷之寺有宋禪幽寺碑云元嘉十四年創立精舍于金蓋山初不言楷時有寺且何山之名于梁吳均詩始見之疑楷嘗學于此山其名蹟在人後人慕之卽其處爲精舍耳謂楷以其居爲寺者非也禪幽寺碑

開

至唐會昌時已斷裂無幾有張道規者以爲式道人書
識而龕之今碑亦不復見嗚呼晉之士大夫可謂求志
而得其志矣其退也處山林而以讀書爲樂其出也居
城府而以治民爲事或出或處不過乎數十里之間其
人物風流可以想見也楷距今幾千年此寺之廢興屢
矣世以爲可久者莫如金石之傳旣金石罄滅而此山
之名獨存則謂人物風流非士大夫所先而虛名無益
于後世者非陋歟余老矣方買田若溪之上則此山將
皆爲吾杖屨所有其可不留語山中爲吳興故事乎乃

訂其本末而并書之紹興十年十月記

浮溪集卷十八

開

化

圖

壽

Waltham Library

開化圖書館

Kaichua library

開化圖書館

Kaichua library



開化圖書館

Kaishua library

開化圖書館

Kaishwa Library


Blue Cyan Green Yellow Red Magenta White 3/Color

© The Tiffen Company, 2007

TIFFEN Color Control Patches

Centimetres

1 2 3 4 5 6 7 8 9 10 11 12 13 14 15 16 17
1 2 3 4 5 6 7 8 9 10 11 12 13 14 15 16 17
Inches



浮
溪
集

四

Washburn Library
Washburn Library

開化圖書

Kaishua Library



Inches 1 2 3 4 5 6 7

Centimetres 1 2 3 4 5 6 7 8 9 10 11 12 13 14 15 16 17

TIFFEN Color Control Patches

© The Tiffen Company, 2007

Blue Cyan Green Yellow Red Magenta White 3/Color